



Literatura • Poesía

PROCLAMA
ÓS
PEIXES
DO RÍO
MIÑO

Manuel María

MEUS amadísimos peixes, ordeados
en tribus, provincias e naciós:
salmóns, troitas, anguías,
escalos, sábalos, lampreas
e aínda o recente blas-blas...

Morades en casais, parroquias,
vilas e cidades que os humanos
non ollan nen descubren:

só a vós

vos falo pois quero sementar no voso
no voso leve e delicado corazón
a flor maravillosa do amor.

Coidade dos fondos subacuáticos
e non deixedes luxar endexamais
a pureza das augas cristalinas.

Confederádevos xa coas galiñoas,
cabaliños do demo, parrulos,
arceas e labancos:

Loita ferozmente
contra tanta polución envenenada
que vos asesina sen piedade
e destrúe a beleza dos ríos
e a perfecta fermosura do mundo.
Defendede ata a morte o voso reino:
¡Fuxide das mortíferas nasas,
das invisíbeis, enganosas redes,
das cordas, dos anzós, da dinamita
e habitade en paz eternamente
a maravillosa luz das ondas libres!